

**Tillaga um breytingu á  
reglugerð KSÍ um knattspyrnumót  
- Bikarkeppni KSÍ í meistaraflokki karla -**

**Lagt er til að grein 3.9.1.2 breytist og hljóði svo (breytingar undirstrikaðar):**

**3. 9. 1. 2. BIKARKEPPNI KSÍ**

- 1 Þátttaka í Bikarkeppni KSÍ er heimil öllum félögum og aðilum ÍSÍ. **[Óbreytt]**
- 2 Hverjum þátttökuaðila skal heimilt að senda tvö lið til keppni, A lið og U23 lið.
- 3 Allir leikmenn félags eru hlutgengir til leiks með A liði félagsins nema þeir leikmenn sem leikið hafa í sömu umferð með U23 liðinu. Með U23 liðinu eru hlutgengir þeir leikmenn félagsins sem ekki hófu leik í síðasta leik A liðs félagsins í deildarkeppni, ekki hafa leikið í sömu umferð með A liði félagsins og eru 23 ára og yngri (miðað við almanaksárið). **[Óbreytt]**
- 4 Keppt skal samkvæmt útsláttarfyrirkomulagi, þannig að sigurvegari leiks heldur áfram keppni en taplið er úr leik. Draga skal um hvað lið mætast og skal það lið sem dregið er á undan leika á heimavelli. Þess skal ætíð gætt að U23 lið félags dragist ekki gegn A liði sama félags. Keppnin skal vera tvískipt:
  - a. Undankeppni
  - b. Aðalkeppni
- 5 Í undankeppni taka þátt öll lið nema þau, sem taka þátt í Símadeild. Svæðakeppni skal viðhöfð í undankeppninni og keppni liðanna hagað svo, að 6 lið komist áfram í aðalkeppnina. Skal undankeppni lokið eigi síðar en 30. júní.
- 6 Aðalkeppnin skal hefjast eftir 1. júlí og þá hefja liðin sem leika í Símadeild þátttöku. Úrslitaleikur og undanúrslitaleikir bikarkeppninnar skulu fara fram á Laugardalsvelli og skal keppninni ljúka í lok ágúst eða í september. Mótanefnd skal þó heimilt að láta leiki í undanúrslitum fara fram annars staðar en á Laugardalsvelli við sérstakar aðstæður. Mótanefnd annast framkvæmd leikjanna í samráði við leikaðila.
- 7 Í keppninni skal leikið til þrautar. Sé jafnt eftir venjulegan leiktíma skal framlengt og sé enn jafnt skal fara fram vítaspyrnukeppni. **[Óbreytt]**
- 8 Venjulegur kostnaður við leiki, þ. e. 20% framkvæmdargjald til heimaliðsins, ferðakostnaður keppnisliða (fargjald fyrir allt að 22) og ferða- og uppihaldskostnaður dómara greiðist að jöfnu af báðum leikaðilum. Leita skal hagkvæmstu flutningsleiða. Tekjur af seldum aðgöngumiðum og tekjur af útvarpi og sjónvarpi skuli skiptast jafnt milli leikaðila. Allar aðrar tekjur skulu renna til heimaliðs, nema leikaðilar komist að öðru samkomulagi. **[Óbreytt]**
- 9 Í úrslitaleik og undanúrslitaleikjum skulu leikaðilar eiga rétt á öllu auglýsingasvæði við leikvöllinn. Í úrslitaleik skal þó KSÍ eiga rétt á 40 metra auglýsingasvæði miðsvæðis meðfram langhlið vallar og 20 metra til hvors enda fyrir fasta styrktaraðila. Svæði því sem kemur í hlut leikaðila, skulu þeir skipta með sér til helminga og hljóta óskiptar tekjur hvor fyrir sig af sölu eigin svæðis, nema leikaðilar komist að öðru samkomulagi. **[Óbreytt]**
- 10 Hugsanlegt tap greiðist af leikaðilum að jöfnu. Verði að aflýsa leik, gilda sömu ákvæði og í Íslandsmóti. **[Óbreytt]**
- 11 Af leikjum í aðalkeppni skal greiða gjald í sameiginlegan sjóð af nettótekjum þar sem til tekna eru aðeins taldir seldir aðgöngumiðar, sem hér segir:

Af leikjum í 1. umferð aðalkeppni 10%.  
Af leikjum í 2. umferð aðalkeppni 10%.  
Af undanúrslitaleikjum 15%.  
Af úrslitaleik 15%. **[Óbreytt]**
- 12 Sameiginlegum sjóði, sem skal vera í vörslu gjaldkera KSÍ, skal skipt þannig, að fyrst er greitt tap, sem þátttakendur hafa orðið fyrir og skal greitt hlutfallslega, nægi sjóðurinn ekki fyrir öllu tapinu. Verði afgangur, skiptast eftirstöðvarnar milli þátttakenda í hlutfalli við greiðslur í sjóðinn. **[Óbreytt]**
- 13 Um aðgöngumiða gilda sömu ákvæði og í Íslandsmóti eftir því sem við á. **[Óbreytt]**

**Skýring:**

Stjórn KSÍ telur skynsamlegt að gera breytingu á fyrirkomulagi bikarkeppninnar þannig að aftur hefji aðeins 16 lið þátttöku í aðalkeppni (eins og var áður en núverandi fyrirkomulag var tekið upp 1994). Þetta myndi þýða að umferðum í undankeppninni fjölgar, en sú keppni er svæðabundin.

Núverandi fyrirkomulag með 32 liða úrslit í upphafi aðalkeppni hefur boðið upp á leiki þar sem úrslitin hafa að mestu leyti verið eftir bókinni og mikið tap hefur myndast þar margir leikir hafa ekki staðið undir sér vegna þess að aðsókn hefur ekki staðið undir væntingum og ferðakostnaður hefur verið mikill.

**Stjórn KSÍ**